

嘉靖九江府志

六

九江府志卷之十五

詩文志

志以紀事詩文弗與也然有事不可考因詩文而見之者則詩文亦所以紀事矣吾潯舊志詩文散出無統紀今以其切於事者分註於所事之下取其考究一事便見一事終始至於不能盡載者則復贅於末卷亦存舊拾遺意云

詩

德化縣

廬山

李白 唐學士

康廬爲巨鎮風浪裏盤根平地安然者饒他五嶽尊

又

權載之 唐人

九派潯陽郡分明似畫圖秋光連瀑布積翠辨香爐

又

蘇軾 宋學士

自昔懷清賞神遊杳靄間如今不是夢真箇是廬山

又

讀書廬山中作郡廬山下平湖浸山脚雲峯對虛榭
紅蕖紛欲落白鳥時來下猶思隱居勝亂石驚湍瀉

又

張鳴善元人

曾到廬山境巉峯際碧空萬松無路入一水與天通
白鹿眠晴晝青猿嘯晚風洪崖如可約吾亦訪雲中

又

胡虛白

國朝寧府教授

我昔夢五老翱翔綠雲中濯足銀漢水上與天門通
仙人坐中峯手持玉芙蓉邀我吹鸞笙相期入空濛

青猿啼夜月夢回迥寥絕遙遙紫霞想忽若千年別
昔向夢中見今從堂上看林巒如夙契煙翠生高寒
天風颯然來頗覺衣裳單恍如陶弘景置我長松間
此景何時遊我夢難再續悵望九疊屏白雲滿空谷

又

我有些紫霞想夢入匡廬峯仙人凌絕頂手掉金芙蓉
芙蓉亭亭九天上疊嶂騰騰湧波浪五色雲中白鹿
鳴三更海底金鷄唱懸崖瀑布從天來匹練倒界青

天開高人似是陸修靜邀我石磴行莓苔九江秀色
可攬結欲跨長鯨捉明月望斷蓬萊青鳥書琪花落
盡無人折飛身上挹香爐煙坐我萬疊屏風前翻然
手招五老坐一笑彷彿三千年松風泠泠吹夢覺鶴
背高寒露花落早知此景隔塵凡只今棲身向丘壑
何人寫此江上山雲山與我心俱閑明當會碾飈輪
去長謝時人竟不還

又

胡廣 大學士

廬阜高寒挿劒鉞晚晴遙望入蒼蒼千尋華蓋從天
下九疊屏風帶雪張影落半湖青黛小秀分南紀白
雲長他年五老能招隱便結松巢跨石梁

又

楊溥

大學士

少年曾泛九江船江上廬山在眼前一片陰雲浮絕
頂千尋瀑布掛長川東吳渺渺晴虹外西蜀迢迢落
日邊披翫斯圖想疇昔獨憐遊宦雪盈巔

又

解縉

學士

扁舟過彭蠡遠遠見匡山巨石危將墮陰雲去復還
平鋪三百里高出九霄間久在風塵際覽觀心自閑

又

吳誠

都御史

虎溪人去遠溪水自泠泠我欲看何物廬山萬仞青

又

李時勉

祭酒

匡廬高起鬱嶙峋翠擁連峰倚斷雲天闊秋陰千里
合風清林籟半空聞松巖過雨泉聲出仙掌飛霞樹
色分終古名山留勝槩幾回臨眺到斜曛

又

夏寅 提學副使

夙慕廬山勝今朝偶一登峰能留客住瀑似愛人聽
古跡多湮沒禪房幾廢興短吟難盡述聊以寄吾曾

又

黃翰 江西僉事

松風瑟瑟馬頻嘶偶得乘閑到虎溪空谷斷崖無鹿
過落花芳草有鶯啼飛流帶雨澗泉急絕頂盤空雲
路低俱是洒然幽絕景不知何處合留題

又

藍智 廣西僉事

峩峩匡廬山渺渺江湖區下蘊龍虎氣上通仙靈都
微雲出巨壑飛雨徧海隅崖瀑瀉銀河隨風散明珠
五老何翩翩蒼然古眉鬚徘徊芝山翁彷彿桃源徒
芙蓉落日淨白鶴秋風孤靈境不可即維舟增鬱紆

又

何年李謫仙讀書石林下雲巢護青松秋色正瀟洒
時登五老峰獨酌壺中春舉杯問淵明誰是羲皇人
鸞鳳望赤霄蛟龍卧空谷蒼崖嗽飛泉欬唾成珠玉

顛倒雲錦袍酣歌漫揮毫文光一萬丈更比廬山高
一落五湖上秋風愁華髮千古不歸來長庚夜如月

又

黃仲昭 提學僉事

欲訪匡廬久未能寥區空見白雲層輶車偶過山間
路旅宿還依林下僧忽忽百年驚白髮寥寥四壁只
青燈投閑便合窮幽勝浮世功名豈足憑

五老峯

李白

廬山東南五老峯青天削出金芙蓉九江秀色可攬

結吾將此地巢雲松

雙劍峯

朱熹

山神呵護寶雲遮儼若騰空兩鎮鉚光彩飛名鎮千
古望中肝膽落奸邪

雙劍峯高削玉成芒寒色淬曉霜清腦脂壓眼人高
卧誰斬天驕致太平

大林峯

謝靈運

晉人

積峽忽有起平途俄已絕巖隴有合沓往來無蹤轍

佛手岩

周廣

都御史

探幽上僊臺一覽衆山小莊誦

聖祖文苔蘚剥未了突兀佛掌出低壓僧伽帽舉瓢酌
石髓煙霞何縹緲偶結山中緣與君弄瑶草

又

程啓充

御史

有拳不能握龍象力非小流幻付指掌空覺何人了
回向不二心山風吹落帽苦海愁茫茫慈航何渺渺
君看泡影中明滅如腐草

又

謝迪

兵備副使

踏遍五老峯更欲探奇跡飛巖若張蓋中有泉一滴
取酌洗塵心翛然獲賞適雲窩足我樓天竅憑誰闢
携筇入雲層陡覺仙凡隔松巔白鶴雙凌風振高翮
愜我平生懷茲遊豈無益

潯陽江

白居易

唐人

潯陽欲到思無窮庾亮樓高溢浦東樹木凋疎山雨
後人家低濕水煙中菰蒲餒馬行無力蘆荻編房卧

有風遙見朱輪來出郭相迎勞動使君公

又

林景熙

元人

三弄知何處蒼茫起釣舟閑將千古意吹入九江秋
驚鴈顧殘侶寒風生別洲曲終和月卧無夢到涼州

又

藍智

今日泊船九江口昨日泊船彭浪磯木葉風高雁初
落荻花水生魚正肥荒城隔浦晴吹角明月誰家夜
搗衣遙望故園秋色好青山有意待人歸

桑落洲

范德機元人

桑落洲前秋興孤白雲遠見近還無傳聞酒吏經年
罷美釀家家得縱沽

瀛溪

蘇東坡

世俗眩名實至人疑有無怒移水中蟹愛及屋上烏
坐令此溪水名與先生俱先生本全德廉退乃一隅
因拋彭澤米偶似西山夫遂即世所知以爲溪之呼
先生豈我輩造物乃其徒應同柳州柳聊似愚溪愚

天池寺

存初公

唐人

漢王峯上擁樓臺萬綠陰中石鏡開明月和僧窻外
立天風吹鶴日邊來一匡翠岫煙霞好九疊雲屏海
嶽魁爽氣蕩空塵世少仙人爲我洗茶枯

又

姚昶

江西叅議

愛此天池景延還欲未行誰知千仞上獨見一泓清
終古涵天碧逼霄映月明許吾分一滴爲雨活蒼生

又

龔璩

廣西按察使